

Gera vēita

Geresnēs vēitas kor jau begausi
Po šlouta orva pelelē rausē.
Nieks če nemata, nieks če nežēna,
Slostu padietē če dar nieks neketēna.
Būtom gīvenus gal ēlgus metus,
Katēns pamatē per ražus retus.
Apvertē šlouta – vēsa orvieli,
Tēp sunaikindams peliu lizdieli.
Geresnēs vēitas niekor nerasi,
Pri seima rūmu jē prisikasi,
Tēn šēlta vēita, apsauga gera,
Linksmā gīven tēn so vēso pero.
Sakuos teturi tarnīstē prasta,
Ēštēn nivēina nieks nebiškrapšta.
Par saktus nagus ēr melagīstē,
Ne sava krasies ožem tarnīstē.
Vuo ka rinkiejems netektom bliautē,
Siūlīčiuo krasiem kuojēs nupjautē.
Ka nebebus kor minkštā siedietē,
Nustuos ē vēitas tuokiuos nuorietē.

Vēštakloms

Vēšta rada stuora slēika,
Manē skanē pavēišietē.
Slēiks, besēdžiaugont, pradinga
Nesospiejē nē regietē.

Kas atsitēks, nežēnuosi,
Gruobis dinga pupat nuosē.
Tik par aukuos apdairoma
Kaltink sava vēštakloma!

Je miešlīnus tekapstīsi,
Gera gruobē neprašīsi.
Kor geriesni gruobi rastē?
Če ne vēstuoms besoprastē!

Kaimīnā

Kaimīns, sotēkēs kaimīnieli,
- A gera nuotaika? – paklausē.
Vuo šēs atspiedams anuo minti,
Rīžtingā riežē šēm par ausi.

Nuoriedams artēma priglaustē,
Nuoriečiau tiktā tēik paklaustē.
Padiekavuodams ož draugīstē,
Par buki adatas a gal ēšlīstē?..

Raganuosē

Nieka žmuogos nežēnuosi
Kor sutiksi raganuosi.
Parduotuvie a kontuoruo,
A kaimīna sklīpa tuoruo.
Raganuosiu vēsor pēlna,
Anū kailis plēks – be vēlnu.
Patīs mauduos pu purvīnus,
Porvās tepdamē kaimīnus.
Raganuosis pakel smakra
I aukštībēs ēškel latra.
Vo jau toukart – Dēivē brongos,
A če žemē, a jau dongos?!
Nieka žmuogos nebsoprasi,
Mesuos kalns tik jau be dvasēs.